

# Odluka o donošenju Zakona o izmjenama i dopunama Zakona o policijskim službenicima

**Koristeći se** ovlaštenjima koja su visokom predstavniku data u članu V Aneksa 10 (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji za tumačenje gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik “pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora”;

**Pozivajući se** na stav XI.2 Zaključaka sa Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim “donošenjem obavezujućih odluka, kada ocijeni da je to neophodno”, o određenim pitanjima, uključujući i (prema tački (c) stava XI.2) “mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta”;

**Pozivajući se takođe** na Deklaraciju Vijeća za implementaciju mira iz decembra 1998. godine u kojoj je Vijeće ukazalo na to da uspostava vladavine zakona u koju će svi građani imati povjerenje predstavlja preduvjet za trajni mir i samoodrživu privredu, što će omogućiti privlačenje i zadržavanje stranih i domaćih investitora;

**Ukazujući na** Deklaraciju Vijeća za implementaciju mira od maja 2000. godine, u kojoj je istaknuto da su “demokratska i odgovorna policija i nezavisno pravosuđe preduvjeti za vladavinu zakona i punu zaštitu ljudskih prava”;

**Uzimajući u obzir** upute koje je dao Upravni odbor Vijeća za implementaciju mira u februaru 2002. godine, prema kojim se traži nastavak ulaganja napora u jačanje vladavine zakona u Bosni i Hercegovini;

**Imajući u vidu** kominike Upravnog odbora Vijeća za implementaciju mira od 11. decembra 2003. godine u kojem je Upravni odbor, između ostalog, pozdravio namjeru visokog predstavnika da usmjeri napore na pružanje pomoći bh. vlastima u nastojanju da osiguraju uspješan rad institucija na državnom nivou, te takođe pozdravio namjeru da se naponi usmjere na poboljšanje učinkovitosti policije u Bosni i Hercegovini, u tijesnoj saradnji sa misijom EUPM-a;

**Vodeći računa** da je u septembru 2004. godine Upravni odbor Vijeća za implementaciju mira naglasio je značaj izgradnje i jačanja domaćih kapaciteta u svim institucijama za vladavinu zakona u Bosni i Hercegovini, uključujući policiju, sudstvo i tužilaštva kako bi se osiguralo da ove institucije budu u potpunosti spremne i sposobne za borbu protiv organiziranog kriminala i drugih težih krivičnih djela;

**Shvatajući** da službenici za provedbu zakona mogu uživati povjerenje građana kojima služe samo ako su dio strukture koja od njih zahtijeva najviše nivoe efikasnosti i stručnosti u radu;

**Imajući na umu** da je Parlamentarna skupština Bosne i Hercegovine usvojila *Zakon o policijskim službenicima* (u daljem tekstu: Zakon) koji ima za cilj da osigura, između ostalog, da policijski službenici koji rade u policijskim organima Bosne i Hercegovine zadovoljavaju visoke profesionalne standarde;

**Vodeći računa** o potrebi da na radnim mjestima u policijskim organima Bosne i Hercegovine budu osobe koje zadovoljavaju najviše profesionalne standarde;

**Imajući na umu** sve ove razloge, visoki predstavnik donosi sljedeću

## **ODLUKU**

**o donošenju Zakona o izmjenama i dopunama Zakona o policijskim službenicima**

**Bosne i Hercegovine**

(«Službeni glasnik Bosne i Hercegovine», br. 27/04, 63/04)

koji se nalazi u prilogu Odluke i čini njen sastavni dio.

Navedeni Zakon se objavljuje na službenoj internet stranici Ureda visokog predstavnika i stupa na snagu odmah kao zakon Bosne i Hercegovine, na privremenoj osnovi, sve dok ga Parlamentarna skupština Bosne i Hercegovine ne usvoji u istom obliku, bez izmjena i dopuna i bez dodatnih uvjeta.

Ova odluka stupa na snagu odmah i odmah se objavljuje u «Službenom glasniku Bosne i Hercegovine».

Sarajevo,

23

decembar

2005.

Paddy Ashdown

Visoki predstavnik

Zakon o izmjenama i dopunama Zakona o policijskim službenicima

**Član 1.**

U Zakonu o policijskim službenicima Bosne i Hercegovine («Službeni glasnik Bosne i Hercegovine», br. 27/04, 63/04), član 126. se mijenja i glasi:

«Član 126.

**Dodjela činova**

(1) Policijskim službenicima koji su na dan stupanja na snagu ovog zakona zaposlenici policijskog organa dodjeljuje se čin u skladu s odredbama ovog člana.

(2) Uslovi za dodjelu čina su sljedeći:

- a) godine policijskog radnog iskustva koje su propisane članom 76. ovog zakona kao uslov za unapređenje u navedeni čin;
- b) prethodna radna mjesta;
- c) godine rada na trenutnom radnom mjestu;
- d) obrazovanje propisano ovim zakonom za navedeni čin;
- e) disciplinska evidencija.

(3) U smislu ovog člana, «policijsko radno iskustvo» podrazumijeva efektivno radno iskustvo stečeno u svojstvu osobe ovlaštene da primjenjuje policijske ovlasti i da postupa kao ovlaštena službena osoba prema zakonima o krivičnom postupku koji su na snazi u Bosni i Hercegovini ili prema zakonima koji su bili u primjeni prije stupanja na snagu tih zakona, što isključuje radno iskustvo stečeno u svojstvu osobe koja nije bila ovlaštena da primjenjuje policijske ovlasti, već je samo obavljala određene poslove i zadatke koji mogu biti vezani za policijske aktivnosti.

(4) Radno iskustvo policijskog službenika sa VI. i VII . stepenom školske sprema uzima se u obzir od dana završetka obrazovanja.

(5) Postupak dodjele činova iz ovog člana će se detaljnije urediti podzakonskim aktom iz stava 5. člana 69. ovog zakona.»

## **član 2.**

Ovaj zakon stupa na snagu odmah i odmah se objavljuje.